

三  
松  
堂  
集

三松堂集卷十七

始甲子夏  
至丁卯春

吳縣潘奕雋榕皋

寄懷圓津院慧照長老

參寥經歲別幽事憶圓津洗硯劑新水謄詩寄故人

承錄

新詩見示懶尋雲外侶自寫畫中身何日清華閣相依結淨因

三松堂夜坐

林下暑初退道人心自閒溼螢依露草纖月挂松關物態番番換塵緣漸漸刪悠然深夜裏城市靜於山

重修泰伯墓詩

文身端委訂前聞

左傳哀七年泰伯端委以治周禮仲雍嗣之斷髮文身史記世家則云二

人之荆蠻斷髮

馬鬣重新古聚墳

史記泰伯世家皇覽曰泰伯冢在吳縣北

梅里聚去城十里

往事墨胎齊逸軌家風季札紹餘芬臯橋遺

廟生春草

今閶門內臯橋東有泰伯廟

梅里豐碑對夕曛欲訪孰哉

攜手處三峯晴卷海門雲

姑蘇城北常熟縣虞山有仲雍墓

題胡黃海贖詩圖

判袂頻將別酒斟天涯珍重故人心雲山萬疊詩千首  
不羨當年陸賈金

兩

春殘寒尙劇一雨欲成霖菜圃餘花墜麥溝行潦深占

晴遊女念憂勞老農心破悶吾何術聊沽濁酒斟

雨中遠村招飲牡丹花下

積雨春垂盡追歡客又來林亭溼翠合水檻暝煙開花  
氣寒猶斂香雲濃作堆愁城吾欲破壺箭莫頻催

芝巖招飲牡丹花下

紫豔紅酣翠幙遮輕陰天意護瓊葩聚頭世外蕭閒侶  
照眼人間富貴花暫借笙歌蕩沈闕底須池館鬪繁華  
裁雲書葉誰能手試譜新聲付笛家

古風四首

羣情紛萬端浮生爭一息有身卽有障誰復能自克得

者喪之根利者義之賊邈焉君子交如水淡可式

大道貴無爲萬物乃竝作憧憧朋從思是處逢六鑿懷  
惠小人心貢媚更可忤何人和天倪與我翔寥廓

一雨生衆綠軒窗明朝暎余心澹無營聊取竹素溫昔  
人去已遠故冊微言存於中苟有得可以見道根彼哉  
夸毗子母乃心神昏

前有千萬年後來無紀極藐焉茲微軀百歲亦瞬息悠  
悠復膠膠白日忽西匿高名與厚實兩者竟何得復其  
見天心吾將學蟲蟄

苦雨

春寒連晦朔釀此兼旬霖濛濛霧藏村淦淦雲埋岑簾  
櫳無晨昏惟聞簷溜音有書廢不觀有帖亦罷臨樹頭  
啼滑滑渺焉阻同心豈無尊中酒掩戶愁孤斟誰稽廣  
川籍開陽閉諸陰飛廉解人意謾謾來松林何能驅積  
霾豁目披沈襟

雨中聞剝啄有客西洽旋歸途紀聞見一一爲我宣上  
言紫竹林天竺祈禱虔下言麥已秀遇潦氣不全嗟哉  
農無麥何以力陌阡書生不稼穡俛仰藉粥饘雖無十  
千取亦望困與屢昨宵鬼車聲啾啾度遙天浪浪勢未  
已默默憂心煎

喜晴

禽語弄暉妍開軒望遠天  
晨光入重幙林彩散寒煙  
便擬攜筇屐還教命管絃  
來朝約吟侶同聽白雲泉

偕畏堂登靈巖入崇報禪院遂遊畢氏山館得

詩二首

上冢乘新霽歸途得勝遊  
石亭嵐翠湧松徑磬聲幽  
竝轡遲靈鷲雲浦書來訂遊西湖未果故云扶筇共子由湖光浮樹杪小

憩竹邊樓

山腰穿曲徑零落舊池臺  
三宿人何處庚戌辛亥余偕夢樓芝原兩遊

宿此閒吟我又來  
吞沙潛潤咽依樹  
雜花開締搆曾親見

憑闌首更回

四月初三日爲京兆君三十周忌卽事志感

卅載一交睫浮生歎逝川紛紜身後事辛苦夢中緣  
偕老虛今世重來應壯年營齋子婦願消息渺重泉

吾與菴贈寒石長老

林木過溪秀已公茅屋深一菴忘世味五字有唐音  
榻爲詩人下門無俗客臨石樓茶話久引我住山心

夜宿白雲精舍

懶厭寢中味閒爲物外遊春歸喜客少夜靜覺山幽  
往事僧能記餘年我自由惟應松際月相伴宿岑樓



遊石屋贈昆峯禪師

京口昔駐錫天平今安禪迢遙中白雲茅屋六七椽邈爾人事隔悠然時序遷我來當春殘氣候初暄妍石亭面絕壁一線中見天岌嶮登頓疲始得臻其顛蹉然聞音喜迓我來山前詫我腰脚健引我穿雲煙危峯有舊題拂薜認歲年入門几硯淨翰墨尋前緣曛黑下山腰分手蒼崖邊僧歸雲中去我亦雲中眠遙岑蟾影吐半嶺鐘聲傳清晨復相過晴窗聳吟肩同心來靜侶

謂寒石

濡筆還分箋隱几坐啜茗支筇行聽泉離緒旣云展鬱襟因以宣逍遙羨解脫蹇劣仍纏牽歸途寄長謠愧未

離言詮天平倘有記他日當同編

陸默齋輓詩

花下共啣卮回頭會幾時屏間金縷曲卷裏牡丹詩

今年

三月同人集山塘芝巖填金縷曲余換韻和之默齋兩用韻見和余賦牡丹遮字韻詩默齋和作最爲新警

泡影原知妄浮休洵可悲尋芳重挈侶忍聽唱新詞

冬客

嘉平默齋招飲一枝軒余賦探春令有等轉頭九九寒消相與再結尋芳伴之句命工譜之管絃今譜成而默齋逝矣

送郭狷甫重遊蕪湖竝柬悅研觀察

柳外子規啼山塘柳色齊來朝帆又挂何日手重攜江  
闌雲低樹湖明水拍隄定多酬唱什莫更懶封題

芳谷歸自楚中以詩見投兼有佳茗香佩之餽

次韻酬謝

西風池館竹便娟錄別裁箋記聳肩落月梁間縈旅夢  
歸帆江上盼經年味分楚尾吳頭遠香散衣篝硯匣前  
一握歡聲堪共慰晝能飽飯夜能眠

檻外紅橋照眼明心花粲與鬪華英連篇籠壁兼金重  
老筆摩空一鶴橫庭下鷓鴣將振采沙邊鷗侶欲尋盟  
寒輕煙暖屏間句待拍新翻舊譜聲春間哲兄芝巖填  
惜餘春慢一闋余  
和作有郭外寒輕池邊煙暖之句已  
命工以笛譜之暇日當請正拍也

和懶菴上人見懷之作

桐花墮地欲平墀正是梅黃雨密時  
晝寢乍興聞剝啄  
鉤簾喜誦碧雲詞

題葉懷庭遺照

直將心事付枯桐消盡清愁是九宮博帶深衣巖壑裏  
風流何似紫霞翁

懷庭所著納楹樓曲譜  
一時度曲者奉爲圭臬

換徵移宮響過雲桂庭涼月白紛紛蔡邕仙去桓譚老  
清梵魚山不可聞

庚戌八月夢樓招飲經訓堂聽懷庭  
度曲今懷庭與夢樓俱謝世故云

紅藥才名海內馳傷心鵬集日斜時  
裁雲鏤月原家學  
未得和聲佐后夔

悼哲嗣中  
翰君也

手澤珍藏有後賢清門文采自翩翩  
斜川宛似東坡老

水調重翻萬口傳

哲嗣羽和深明律呂承示新詞俊逸有宋人風味

四上誰爲賦大招虛堂蕭瑟展生綃何能喚起鄱陽叟

譜我新詞入洞簫

自元人製曲詩餘久不播絃管矣余得白石老仙詞譜以問國工無有能

解者今之言詞者動謂大晟樂譜失傳時譜工尺不合於古不知楚詞大招已有四上競氣字則唐宋以來諒亦同此雖有異名實無異用安得起白石講明融貫之乎

章咸熙以尊甫二梧方伯問花圖索題感念今

昔輒成截句二首

早從茵溷悟前因腸斷江南二月春短幅又增身世感

夢中蝴蝶卷中人

作圖者王蓬心前輩題詩者沈雲椒趙損之同年暨曹劍亭宋小巖褚筠

心俱余夙好墓木皆拱矣

尙記薇垣對直時更無彩筆譜新詞青山橋外東風暖

贏得花前兩鬢絲

余於乾隆辛卯壬辰間與先生同直內閣

立崖以淵如觀察所貽杜陵三徑玉印竝自賦

新詩見示謂杜陵爲子美三徑爲陶徵君鄙

意以爲若自鑄印章似未應以陶杜自命若

鑄以贈人不應時代倒置若但曰子美則少

陵草堂中並無三徑按三輔決錄蔣詡字元

卿隱於杜陵舍中有三徑惟求仲羊仲與之

遊皆挫廉逃名則是印當是蔣姓所鑄或是

杜陵人所藏抑豈竟是元卿故物耶其與少

陵彭澤無涉而其爲宜歸立崖則無疑矣因  
成此歌以贈立崖并質諸淵如

繆文小印何人製珍重瑤華寄無棣錯刀玉案不足誇  
錦段襜褕那須計盤拏瘦勁字出稜拂拭題識認杜陵  
挫廉逃名緬高致往來二仲惟心朋瑳璫瓊瓏光明瑩  
持贈蘇齋恰相稱莫言三輔非三吳姓氏居然是前定  
孫郎矯矯人中豪頻年東國持旌旄握瑜心共玉壺潔  
投瓊誼竝雲天高早知化鵲徵奇瑞更以烹魚結遙企  
燕南趙北路迢迢佳話新詩由驛致一物因人係重輕  
摩挲什襲歲時更直爲立崖能好事令人懷古憶元卿

門生吳集齋 大勳 自閩來蘇訪余三松堂不值

翌日復過畱飲有作

廿載始相見寥寥兩地心尋山遊興懶

屢欲遊武夷未果故云 繫

纜故情深室自盈蘭臭

戊午年集齋寄余龍巖蘭兩盆今正放花

人將老墨

林

集齋乞余詩藁畫冊

松堂談讌罷惆悵欲分襟

乾隆庚戌余登穹窿山與道士金虛舟遊甯邦

塢憩甯邦寺酌明珠泉題名石壁今年九月

虛舟七十初度以紙索詩回首舊遊蓋十六

年矣俯仰今昔率成長歌以贈

參天鴨脚僧廬扁遊屐昔向甯邦停有泉竹下流且滄



與君竝坐傾耳聽掬之味之塵夢醒拂拭蒼蘚題翠屏  
君時五十纔有零牙齒未墮雙鬢青竭來又繫沙尾舠  
屈指幾換砌下萸喜君七十老復丁一卷背誦黃庭經  
如珠在貫水瀉瓶中充未改昔歲形固知縣解辭天刑  
積精自葆三奇靈瑤簪迥露風泠泠月明斗壇來歲星  
長生滿酌引綠醕黃花豔豔搖窗櫺令君忘憂制頽齡  
秋澄萬景羅山亭酒酣我欲掘茯苓披榛一徑幽草馨  
斜陽滿塢山未暝山腰重讀舊日銘

曾賓谷都轉母夫人七十壽詩

僮祁欽壺範燕喜獻瑤觴愛日暄慈竹千霄挺豫章起

居掄狄貴侍從板輿康綵服馨晨膳春暉蔭正長  
守官懷母教移孝勵臣心霽月當空朗澄江與澤深戶  
宜劉晏法屏勒茂先箴願挹如淮酒躋堂歲歲斟

津門待渡圖送劉蓉峯入都候補

指點虛舟渡口橫沙邊幾輩問征程濟川作楫平生願  
最好中流自在行

我挂歸颿十七年蘆花淺水伴鷗眠胥江浩蕩春波暖  
打鼓明年看放船

伊墨卿太守過訪三松堂見示新詩次韻奉寄  
兼柬同年雲林光祿

金昌亭西日欲暮五馬嘶風挽不住使君清節侔松筠  
收帆宦海重問津揚州官梅照官閣飄然一琴又一鶴  
凝香燕寢賦新詩前塵回首秋雲廓江天月白江波深  
一輪印澈冰壺心芄芄待膏黍苗雨肅肅愁聽飛鴻音  
今年秋收頗稔而淮徐決口居民流徙他郡者相望於道故云晝班春夜說史敬事端  
須命以始高旻寺三賢祠歌聲來暮徧竹西奉親安樂  
今其時往事一笑姑置之趨庭服官有彝訓儒林丈人  
吾所師吾衰自棄歸田早輪與榮華兼壽考高軒鶴市  
昨相過剝啄投瓊志永好拏雲健筆凌鍾張泠泠三復  
金玉章寄語阿翁應念我明年聽雨來聯牀

次韻芝巖臘月初七日對雪見懷之作

飄瞥初從松頂看，寒帷旋喜絮成團。  
未妨縞帶廢陳句，自愛薰鑪卻曉寒。  
驢背慣吟餘兔管，江天入畫有漁竿。  
尖叉檢點年時咏，更爲新篇憶舊歡。

雪窗檢篋見悅研香巖立崖諸君子

喜雪投贈諸作今又得芝巖新詠故云

雪霽疊用前韻柬芝巖

初陽破曉樹頭看，伴客烏圓暖作團。  
雙槩可能遊汗漫，一尊聊與慰荒寒。  
裁紅圖出烘窗蕊，飛白鉤來亞徑竿。  
莫道生涯太岑寂，須知冷淡有餘歡。

蟄室獨坐三疊前韻柬芝巖

風景殘年次第看老來情味愛蒲團預占去臘除蟲瑞  
難庇茅檐蔀屋寒擲簡想傾酒百盞擁衾并臥日三竿  
青天又散黃綿襖喜聽聲騰萬戶歡

雪止復作四疊前韻柬芝巖

林亭一色畫圖看不是楊花也作團聽到雲窗真冷淡  
吟成冰柱最酸寒庭空雅噪猶爭樹江靜魚潛不上竿  
誰似田間兩迂叟但呵禿管鬪清歡

五疊前韻答玉圃

三白歸耕幾度看綬綬如舞又如團難邀郢客來同賞  
只有梅花耐此寒鋪徑漸平支磴石壓枝欲折拂窗竿

清虛佳話眞千古肯羨豪門轟飲歡

七姬廟

張羽七姬權厝志七姬皆良家子爲張士誠  
浙江行省左丞潘元紹側室皆溫柔端麗事  
主及夫人以禮其羣居和而有序不爲怙寵  
伎美之行至正丁未七月五日明師圍蘇州  
城垂破七人同日相繼經死元紹殮其屍焚  
之以其骸瘞于後圃合爲一冢屬潯陽張羽  
作權厝志列其姓氏于石而系以銘程氏蜀  
郡人翟氏廣陵人徐氏黃岡人羅氏濮州人

卞氏彭氏海陵人段氏大甯人元紹字仲昭

宋魏王廷美之裔其先以避禍易姓未復云

滿城黃葉卷西風

谷應泰紀事本末張士誠以弟士信為相專任黃敬夫蔡彥文葉德新僨

事吳人為十七字詩云丞相做事業專用黃菜葉一朝西風起乾瀾

齊女門前烽火紅半

壁已看殘局盡七人難得一心同塵龕寂寞流雲磬環

珮淒涼傍佛宮

今廟中供奉大士七姬合為一龕附右

剩有荒池清見底

聯裾照影想驚鴻

廟東偏敗牆外有池廣二畝許應是當日後園故址其七姬塚今已不復

可見矣

張芝岡輓詩

名鳳翼乾隆辛丑進士前任安徽太平府教授

夫君聞道早葆素亦同塵退有青氈樂交能白首新歿

甯何怛化神返或歸真我本忘情者難禁涕滿巾

蓉峯又以乘舟圖索題得詩二首

劉侯作楫材素願在經世有如萬斛舟所載不可計云  
何十年來杯水均堂滯同年王椒畦寫圖特相勵頓令  
利涉心一往不能繫春波漲胥江風正舵初捩吳天氣  
融和燕山路迢遞計日晦朔弦計程江河濟船頭旌容  
與船尾旆搖曳行看貫月槎飄飄到天際

天際望無極余懷渺以紆自君居城西來往德不孤讀  
畫畫啜茗言詩夜引觚追歡驚別遽憶往嗟年徂鸞鳳  
志雲漢魴鱣遊江湖飛沈跡或睽出處中不殊知君超



曠趣迴異競進徒夙抱既云展初心未肯渝蓬窗坐嘯  
餘披卷當念吾還期政成後更寫歸舟圖

和段茂堂偕張涵齋探梅鄧尉遂遊靈巖之作

聞說銅坑路花開勝往年孤村殘雪裏萬樹短筇前雲  
氣連諸嶺晴光獻衆妍行吟想二老欲去尙遲延

春遊會襍被訪友到山居花影渾無際詩篇愧弗如人

今鬚鬢改夢與歲時疏社柏參天古臨風還竚予程在山秀

才居山間築清暉閣以吟咏自娛乾隆丁酉余病歸里  
來遊山中宿柏因社僧房翼日往訪在山登閣吟眺湖  
光花影與琴尊圖史相映主人出新詩諷賞皆清遠有  
致在山物故地爲畢氏所闢今亦頽廢矣柏因社郎  
司徒廟廟中四柏俗指分清奇古怪者今巋然尙存

路轉又移舸晴波綠半篙千盤凌石磴十里聽松濤遊  
興春能健吟情老更豪因君思鼓舵信宿不辭勞

三月初七日春在軒牡丹盛放招諸弟姪等小

飲有作

世外閒容我人間重此花莫嫌太岑寂故與炫繁華日  
上紅雲擁風微翠幙遮遲遲春正好相對酌流霞

弟姪輩竝有和作再用前韻

布席依芳榭分牋賦大花

宋時謂牡丹爲花猶今嘉湖人呼桑曰葉也周草窗樂府

有填霞翁譜賦大花詞

春光眞澹沲陋室也清華品豔劉師閣詞

翻蘇幙遮憑將書葉管散作滿天霞

宿李涪江別業餘清室題壁

逸客幽棲處門前嵐翠橫  
方池魚可數曲徑筍初生  
小憩因遊倦安眠覺夢清  
條然羣籟寂遠寺送鐘聲

白雲泉晤崑峯長老作

討春歲歲訪禪扃手拓疏窗面翠屏  
腳力已非前度健嵐光不改舊時青  
細看梵筴經生字

崑峯藏有唐經生書毗婆娑論一卷

擬搦焦山瘞鶴銘話到輞川最淒絕  
松門深鎖忍重經

崑峯昔居京口與夢樓最相契密時訂作焦山之遊故云

思作焦山之遊未能成行雨窗檢篋得新年范

芳谷漢陽書言除夕遊山之樂因成二絕卻

寄

衰遲百好已全休，擬挈枯藤作近遊。  
昨夜扁舟過京口，夢隨鷗鳥宿沙洲。

風雪開尊大別山，幾人忙處解偷閒。  
何能便放煙江棹，同款山僧松下關。

丙寅三月二十八日虎邱三泉亭新建倉聖祠落成，蔣子于野邀余與支山旭亭同往致祭，祭畢登仰蘇樓得詩二首。

昨聞三泉亭拓地，祀倉聖。邦人重文字，締構竭誠敬。蔣生頗好事，作記才思橫。撰辰羞藻蘋，放艇更我迎。是日

微雨過六合纖埃淨緬昔一晝開瀆悶代寥夙維聖擅  
制作利用徧羣姓食德不知酬忘本吾所病虛堂肅明  
禋悚惕歡欣併虔祈臍蠻通無取牲醴盛祭宜繼自今  
典未垂於令再拜慶禮成精意神其鏡

茲來非遊山竣事獲幽賞僧廬面盤陀新綠密於幌振  
策風泠泠曲折層岡上髯蘇遺跡在千載風流仰岑樓  
拾級升清遊愜吾黨此間百花露名播海寓廣釋子不  
諷經生計託瓶盎遂令古佛廬雜沓失疏爽怪彼方外  
徒物役劇勞攘因知身是累僧俗固無兩雖無婚嫁迫  
亦藉口體養小憩慨浮生誰歟脫塵網

支山見示戊申京兆鄉闈分校時家蘭垞侍御  
所寫扇頭墨梅竝分校諸君子所題詩句因  
題於後

煎茶韻事憶坡仙

東坡有試院煎茶詩

夢醒鈞天十九年贏得暗

香畱便面雪泥鴻影話前緣

宋汝和觀察餉湖蓴枇杷

食單珍湖蓴風味最幽異當時張季鷹爲爾動鄉思廣  
平澹蕩人與我有同嗜臺餽拜一提遠自具區至牽風  
苕帶長含波雉尾膩便思汲井華斟酌下鹽豉登盤滑  
流匙飽德企高致

三才集 卷一  
炎果當夏熟白沙乃其尤分甘逮故人珍與瓊瑰伴玲瓏翠箬籠磊落黃金毬堆案觀朶頤愧茲淑貺稠微吟誠齋詩未食涎已流非徒利五臟先期潤枯喉旨哉風露足肺病吾其瘳

崇真宮葉竹虛道士性恬靜喜翰墨今年五十  
初度以紙索詩有贈

我愛竹虛子心虛鍊五形離塵能見獨住世悟櫻甯靜獲長生訣閒披大洞經華陽許共戴飲水學修齡

題張君度畫

密竹滴殘雨高峯留夕陽

君度自題句

幽人相對坐心與水

雲涼

止念衆喧寂息營羣妄祛高齋倩題榜合署櫻甯廬

額約齋侍郎奉

命督理兩淮鹽政先施手翰諷誦靡已吟此寄懷

判袂無由更盍簪粉垣投分廿年深貽來尺素情彌摯  
話到前塵感不禁春韭秋菘老圃業停雲落月故人心  
何當便放邗江棹同上金焦豁滯襟

單竹軒治中晚香圖

萬卉各成歲幽懷獨葆真偶吟衰露句欲訪漉巾人物  
外秋容澹籬邊月色新笑他車馬客但賞豔陽春



送瞿花農運判之官浙中

此日湘江上猶聞竹馬謳

君前通守湖南

新輝分贊治轉運待

持籌江白濤聲震湖平嵐翠浮因君動遊興春到欲移舟

郭匏雅以所藏張東畬未竟山水橫幅足成長

卷題詩屬和因次其韻

剩墨添來峯兩三晴窗點筆興清酣故人泉下無消息  
一卷珍藏老學菴

郭匏雅爲其孫僧壽作山水卷屬題

雙林

匏雅所居巷

讀畫吾停屐春草

匏雅齋名

揮毫君課孫他日

客兒能述德風流文采在清門

李滄雲少京兆輓詩

息轍半年外服官卅載強遺塵捐害馬閱世悟亡羊集

已珍吟社

君詩刻有專集行世

貲誰寄草堂

君歸里卜宅未有定居

傷哉望

雲客猶誦白華章

令嗣虎觀司馬卓薦引都告歸省觀尙未抵家故云

見入

題鍾吾山李補樵道士畫山水

夾路草生香氣參天樹倚斜暉回首舊遊如夢臺懷古

寺白雲

白雲寺爲五臺山最勝處

孟期思今不見老先生住何山但聽讀書聲響撥雲試

叩松關

唐紀聞譚武威段畧天寶五載過魏郡逆旅有客市藥畧知是道者旣市膠薦之自言吾姓孟

名期思居在恆山碧祈至山中遂約入山居五日孟先生曰今日蓋謁老先生於是啟西室老先生據牀碧謁拜焉碧在山四年見老先生出戶不過五六度但端坐正心禪觀不食每出禪時卽飲少藥汁碧問孟叟老先生爲誰叟取晉書郗鑒傳吟讀之曰欲識先生卽鑒也

會爲尋眞移屐石細路古人稀百道泉聲迎我四山晴  
翠露衣

浙浙風搖修竹粼粼石漱流泉那得三間茅屋看雲讀  
畫閒眠

爲徐筠嶠題其亡姬席澹如畫冊澹如名文卿  
何年淪謫下瑤京一夜霜風冷玉笙畱得飛瓊名氏在  
藝林豔說席文卿

搖風修影碧檀欒墨瀋飛騰露未乾此日披圖增太息  
新詩題得不曾看

筠嶠以澹如畫索題題  
就寄去而澹如已逝

結習多生翰墨緣故知慧業定生天彩雲易散琉璃脆  
賸粉殘香劇可憐

舍西闕隙地雜蒔蔬果有作

屋頓材堪撤

說文廢  
屋頓也

庭荒草已刪吾將以圃老客笑似

兒頑鋤徑先栽菊平畦不疊山無須論結構聊取養幽  
閒

小軒面場圃俯仰儘寬然擊壤安耕鑿開尊對聖賢病  
餘宜謝客慵甚學參禪夢醒南窗下還披蔡癸篇

題徐侯齋高士遺像冊

肥遯人何處荒村剩草堂梅花落殘雪杜宇叫斜陽短  
冊鬚眉古零箋翰墨香

後附裝遺屬一頁

清輝不可接徒此挹

餘芳

崇真宮葉鳳梧道士招飲竹虛山房用孟襄陽

梅道士水亭詩韻

脫網咀禪味攜朋訪羽流微言原不二創論若爲酬

道釋

兩教互相詆毀或謂三教同源亦調停之說言其道之  
同而未云其派之合也余據史記晉書竝高僧傳謂老  
子入流沙爲浮屠之教以爲老子卽釋氏之祖嘗於西  
山僧寒石所刊支遁集序中暢發其旨寒石不謂然卽  
吾儒中亦未有以爲然者近閱後漢書襄楷傳知當時  
之人已言之矣夫漢去周末遠且漢時佛法始入中國

必更有確見則老子之爲佛  
法之祖似創論殆確論歟  
市遠鐘魚靜庭深竹樹幽

丹房聊小憩真似泛虛舟

題馮墨香鄰墅借書圖

虛館耽幽寂條然寄視聽  
一甌鄰肯借兩版書常扃  
枕祕誇鴻寶窗明發古馨  
讀書珍善本吾欲訪元亭

和段懋堂龍樹菴看梅之作

曲徑孤筇得得來祇林古幹問誰栽  
儘容野衲閒評賞可有春風爲剪裁  
冷蕊漸看迎旭景疏枝何礙點莓苔  
羨君新歲新詩好索笑巡檐定百回

余既和懋堂龍樹菴訪梅詩書來訂余同觀遂

至菴中時天氣回暖殘英在枝餘香滿院得

長歌一首

往年看桂雲隱菴今年訪梅龍樹菴菴荒路僻昔未到  
仄徑曲折輿丁詣度阡越陌步短徠夏天脩竹如榲枿  
老僧樸野喜肅客升階先引參瞿曇循廊拾級陟小閣  
憑窗破鼻香風醺段侯嗜好與時異扶筇春到思幽探  
爲言此梅閱歲古似避俗子依精藍吳人好事說袁墓  
尋芳放棹停驂驪豈知城西不十里有美掩匿幽香含  
草深樹雜徑蕪沒梅不自惜僧懷慙有如佳人在蓬戶  
又似志士棲江潭段侯自許梅知己得我爲二不可三

吟哦翫賞日將夕頗憾未挈酒一甌小軒石刻舊所庀  
捫壁默讀吾猶堪禪門興廢更可慨往事欲訪誰爲談  
僧言徒侶不持鉢耒鋤能舉禾能擔春深雨足秋露飽  
香積自給杭菘甘六時禪誦亦不輟雖曰方外如丁男  
吾衰于世了無益獨善閉戶師孔聃畏人幽棲宜此地  
戢影何必窮煙嵐段侯於我性相契逸興亦復逢花憨  
秋來庭桂應更好信宿彌勒期同龕

復次懋堂韻

新詩催我出城來古樹摩挲逝者栽弄月吟風呈道妙  
鏤冰斲雪見心裁何須東閣纔畱句可惜南枝半委苔



三才集卷一  
記取僧樓佳話在尋芳二老共襄回

山陰縣治南里許有明徐文長先生故里中有

青藤一本蟠屈如虬松爲先生手植藤覆方

池池寬徑十尺許冬夏不竭名天池故先生

自號天池又號青藤居士後陳老蓮

洪綬

居

此題曰青藤書屋今爲邑人陳氏所有寫青

藤古意圖徵詩因寄此作

天池山人今不作池上天矯餘青藤青藤花開復花落  
過眼世事如風燈人生知己眞難得命不副才長歎息  
花前重譜四聲猿此心只有禰衡識越山如黛水如藍

剩有遺聞佐客談一樣數奇同不朽滄浪亭子桃花菴

三松堂集卷十八

吳縣潘奕雋榕臯

試帖

心正則筆正

得懸字

字本從心畫功居運腕前敬原卽是學正亦有由先波  
礫期無苟精神貴以專靈臺能自主不律詎操權落想  
真超矣含毫獨邈然聖應師內史狂不效張顛舞鳳惟  
矜格簪花漫逞妍

宸章程藝苑筆諫重誠懸

顏苦孔卓

得窮字

聖道懸如的賢人殫厥功庶乎原若契卓爾未能融克  
復工夫密高堅智力窮從來樂不改應識苦能通練曳  
吳門白瓢懸陋巷空循循歸善誘矻矻嘆難同德冠三  
千哲心依數仞宮君師

皇極建萬國仰崇隆

紀昌貫蝨

得專字

藝士神其業相傳蝨可懸射矻巧力絕貫訝技能偏鵠  
設同芒忽禪看失僕緣捫來揮塵暇中處應絃穿繳與  
春風裊弓隨夜月圓嫻如手可撥牛比目無全么響阿  
房隱新聲狸首宣藝成堪證道用以勵精專

紅鑪點雪 得工字

候火鑪騰燄迎冬雪捲風霏霏看漸灑點點已胥融炭  
熱雙環熾花飛六出同始然手可炙欲起絮還空暖透  
書帷裏寒消竹徑中誰矜鑄匠巧不數賦才工積去無  
邊白鎔來一片紅甄陶逢

聖治精潔勵臣衷

聚米爲山 得山字

制勝憑多算訂謨樽俎間規形聊聚米布畫儼成山積  
處分鐘龠堆來擁髻鬢靈曾傳擘異丁已陋開艱彷彿  
聞籌唱透遲念轍環千盤迷杳靄一握認孱顏地縮三

邊近圖呈八陣嫻

宸衷方略廣不用戍重關

射隼高墉

得高字

有隼情非擾乘墉氣轉豪獲之無不利射者豈辭勞一  
發看抽矢千盤憶下臯危因非所據急亦念其曹未許  
依人飽甯教帶箭逃血飛山堞迴影落暮雲高刷羽空  
憑險櫻鋒敢恃驚我

皇方奮武埽穴灑風毛

晴雲如擘絮

得晴字

雨止雲猶密長空乍快晴開宜風卷疾擘訝絮飛輕霄

樹枝還亞鋪巖岫欲平散隨初旭暖薄映晚煙明紛作  
千團聚低看一縷橫天因新霽曠人喜出郊行似錦裁  
猶早如羅織未成熙春迎淑景茂對暢

皇情

汲古得修綆

得懷字

汲古期心獲資深夙志諧及泉功不淺得綆願甯乖軋  
軋機初引綿綿趣轉佳淵源探聖典杼軸出余懷學海  
非無筏文津詎有涯陳編頻許索妙緒肯教埋縹帙羅  
香几朱絃靜竹齋

緝熙欽遜敏文治邁義媯

登春臺

得臺字

符六天階正登三

聖治該世咸躋壽宇人擬上春臺杳靄和風扇沖融淑  
景迴游衢尊正滿拊瑟鳳初來地迴重霄接花繁四面  
開聚升占允若交泰詠熙哉麗日暉遙甸彤雲擁上台  
由庚

釀化浹萬彙樂滋培

樵夫笑士

得羞字

王道談非易膠庠品最優何來挾策侶騰笑採樵儔野  
處才甯乏經橫業未修听然弛負擔莞爾獻嘲羞白腹



虛聲盜青山逸氣適荷蓀甘石隱畫餅陋名流直擬文  
移北何堪帛賁邱作人逢

聖世山澤遍薪樵

結網求魚 得筌字

臨政臨淵似名言緬廣川求魚情自切結網計宜先物  
想千頭聚張看萬目全沉波蒲影動撒雨澱文圓江闊  
生春水帆輕截暮煙布時雲艇遠跳處錦鱗鮮飛雪還  
思鱸收綸不用筌

聖朝綱紀飭烝罽樂興賢

海不揚波 得恬字

海宇登仁壽

恩威仰被漸時和，微化洽風靜識波。湑岸接空青杳天，  
連一碧黏更長。占候羽程穩報郵，籤圓嶠晴雲朗扶桑。  
旭日暹浮看槎舶，小幻訝市樓兼煙洗奩。同淨瀾迴穀  
比纖休徵重譯告，永遠慶安恬。

草以春抽

得抽字

庶草逢時茁春郊，碧色浮建寅和氣轉。孚甲嫩芽抽纖  
透微風長濃曛，淑景柔青回一夜雨。綠到百花洲南浦，  
人迴權西園客上樓。乍看芳信逗不放，燒痕畱調馬叢  
猶淺鋪茵暖正稠。由庚

澗化溥生意喜盈眸

若網在綱

得條字

馭物先求本臨淵治理昭綱看提以要綱豈紊其條秩  
秩疏非漏恢恢布自饒整來殘雨滴撒處溼風飄霧散  
沉官渡煙和集市橋一江春灑展九畝錦鱗跳卽目經  
綸寓從心緩急調弛張瞻紀飭

醲化八絃遙

如石投水

得如字

往代明良會人傳契合初受同水瀾瀾投擬石徐徐赤  
帝先呈兆黃公更與書他山思少助滄海本兼儲作礪

來雲外爲瀾驗雨餘一卷甯浪擲千頃自涵虛天授誠  
非妄人謀信有諸

高深今陋漢

聖量仰淵如

上善若水

得虛字

上善期謙牧矜高聖不居試觀水就下何似量兼儲卑  
豈能辭垢澄惟在集虛亨心占習坎得止驗成瀦源擬  
探星宿盈還洩尾間洪深窺渺渺涓滴赴徐徐只訝清  
如許誰知納有餘

聖衷宏翕受沖抱契淵如

鴻毛遇風 得輕字

聖世明良會賢臣  
頌載賡鴻如欣所遇  
風擬御而行蹟  
末生潛籟雲間趁  
遠程踏來泥爪杳  
扶到絳霄輕興滿  
原山質吹嘘自有情  
影看翮彼起韻喜穆  
如清曰聖休  
還協爲儀象早呈漸  
遠符夙願解臯仰

衢亨

以恬養知 得恬字

繕性非矜智歸真在守恬  
用惟藏乃備神以養而潛定  
似波涵影澄同鏡啟奩明通  
公溥合澹泊靜甯兼志自  
深深斂光還續續添尚元亨  
有酒生白室垂簾機慮看

三才全書 卷一  
消盡塵緣不染纖

直聰淵鑑朗抱一仰懷謙

他山之石

得他字

畜德求資益鳴皋諷雅歌有山皆蘊藉維石最嵯峨選  
勝宜于此含輝耀自他一卷攜秀皺數片愛摩挲突兀  
青凝黛玲瓏翠割螺堅堪期日錯厲怡稱如磨韞處光  
常好攻來質若何爲章追琢貴

盛世席珍多

禮樂乃興

得成字

盛治興仁讓彌綸大化成禮傳無體意樂著有倫情肅

肅圭初執雝雝鳳叶鳴竹宜裁大夏絕憶集諸生殺地  
昭同異爲文驗減盈未妨遲又久但覺美而誠物紀睢  
麟瑞人徵血氣平中和欽

聖制萬品樂由庚

天道張弓

得弓字

於穆天難問無爲道秉公敲來圓似蓋張處曲如弓損  
益惟參變高卑允執中誰窺持滿意儼示福謙衷殷率  
懸無象璣衡運不窮戴盆談漫逞省括視甯蒙弦月彎  
彎上弧星兩兩同奉三欽

建極巧力仰

神功

微雨種花時

得時字

小雨初過候名花半放時  
要看生趣滿須趁薄陰移  
濃淡開如錦橫斜散似絲  
一天雲意重三徑土華滋  
溼榦鶯堪坐幽香蝶未知  
迎風敲嫩蕊得氣占疏籬  
殘滴猶敲竹微馨欲上墀  
發生覘萬彙

聖澤仰無私

柳汁染衣

得衣字

三峰徵及第九烈示先機  
小騎芳郊遠柔條嫩葉肥  
隱林間吉語彈指染春衣  
慘綠人原貴紆青願不違  
故香



披掩冉新色，迥芳菲正喜。拖藍踈旋，欣淺碧依襟。開風  
淡蕩，汁灑雨霏微。

太液呈人字，明年更賜緋。

風不鳴條

得和字

聖德彌天地，祥飈扇太和。柔條初暖日，淑氣不驚柯。靄  
靄青蘋起，泠泠碧檻過。時聞啼鳥換，但識落花多。煙散  
靈和柳，紋生太乙波。嵐光橫縹緲，樹影颺婆娑。紅自翻  
階藥，輕還拂澗蘿。化工神鼓盪，煦嫗徧嘉禾。

黃人守日

得人字

帝德遐方仰，天文垂象新。再中五色日，有守二黃人。自

遠成輸款相依應  
浹旬昭彰承一字  
擎跽擁重輪宛爾  
來相附依然莫不  
親郁紛紫氣繞抱  
戴瑞光勻玉燭時  
方泰金烏夕未淪  
傾葵真有願藹藹  
寸衷伸

德車結旌

得同字

玉輦乘時運金根  
結束同悠揚原不  
貴觀飾詎云工  
晻靄和風轉光華  
麗日融雲旗懸縹  
緲環轡響瓊瓏禮  
美輝含內爻占文  
在中黜浮明主德  
尚綱聖人衷用識  
參衡意羣瞻質樸  
崇

堯心千古仰黃屋  
慶延洪

共登青雲梯

得同字

雲路真迢遞登臨興未窮彙征諧夙願聯袂喜能同自  
抱凌虛想誰施撥霧功三霄排灝氣千里趁長風碧落  
清虛府丹霞縹緲宮天衢何浩蕩

帝德自帡幪莫憚攀踰遠相期汗漫中同懷欣有客向  
日共和衷

明月照高樓

得明字

海上冰輪湧樓頭桂彩盈晶瑩澄萬景皎潔照三更纖  
映蛾眉朗圓齊玉鏡明簾垂人不寐廊靜夜無聲卓午  
波偏滿昏黃影正橫朦朧看隱樹縹緲聽吹笙鉤自依  
銀蒜輝還散玉楹美人何處望千里寄遙情

忘機鳥狎人

得衣字

嗒爾人忘我悠然鳥不飛  
機心渾不動幽境許相依  
脈看舒翼翩翩乍弄暉  
不須三匝繞初罷五絃揮  
莎徑花初放湘簾風正微  
銜泥時落几啜水任霑衣  
樂意能同領微禽早識幾  
濠梁清興並吟眺未言歸

圭璋特達

得圭字

特達由來重

彤廷寶介圭榮光騰璐卍異彩煥璇題  
貴直侔鐘鼎珍甯論玦琕薦馨尊上帝庇  
穀惠羣黎叩去聲如樂操來氣似霓方  
流人共羨重席自堪躋應待元纁裏還  
宜束

帛齋

聖朝崇至德拂拭仰提攜

刻舟求劍

得如字

劍失何由得舟行信所如求時空想像刻處太拘墟擁  
楫徒爲爾騰波信有諸青萍知己化畫舫去猶徐漫想  
新礪試難將故見除卽看痕尙在至竟願終虛虎氣雖  
難隱蓬心孰與祛言詮參妙契試證漆園書

破觚爲圓

得觚字

大道非矜智還醇更破觚直須歸渾樸不用飾廉隅上  
鼓追前範汗樽仿舊模敦龐真有味琢削更何須柄鑿

甯嫌格規摹莫笑迂質看同太古巧不藉公輸至治名  
無象澆風挽競趨無爲瞻

聖化儉德邁唐虞

游絲映空轉

得晴字

空際天光皎絲看一縷橫悠揚渾不定流轉更多情柳  
外迎飛絮花間冑落英湖天濃霧霽山市積陰晴忽作  
淩虛想眞看照眼明似疑低日午未墮舞風輕松棟卿  
雲縵茅階玉柱清

宸襟隨處愜勝賞在蓬瀛

臨風舒錦

得波字

美錦初成製臨流試濯波光明新采煥舒卷好風過出  
水鯨翻浪懸林花爛柯色看齊霧縠巧擬翦雲羅蘋末  
潛生籟鮫宮恰罷梭一番剛有信三日未嫌多璀璨人  
工錯悠揚玉律和

明堂瞻藻火逸韻聽絃歌

汲古得修綆

得勤字

學海期修綆功深扞獲聞得來真不易汲處貴能勤自  
有逢源樂何憂用志紛及泉防井棄引緒戒絲棼挾策  
編頻絕窮源膏繼焚孳孳甯力竭矻矻惜陰分務博觴  
徒濫資深富以文我

皇功一貫酌古意彌殷

鮫豪夏舒

得涼字

豪是鮫人織時當夏日長移來吟榻冷舒處午風涼披  
拂清無暑傳看潔比霜淡留新月影濃散一鑪香斲簟  
宜堪亞冰綃未許方侵肌瑩且淨盡眼滑生光物以因  
時貴材緣適用良松窗琴韻靜留與伴琳瑯

卮言日出

得非字

大道無方體卮言未可非天全倪自露語妙理甯違試  
挹流如水還看吐落璣推移真善轉斟酌總隨機莫訝  
瓶難守從教屑屢霏拈囊良足貴無當不貽譏娓娓談



時中涓涓滴豈微支詞今日靜

舜殿五絃希

魚星知期

得知字

待澤窺璿管星文驗可知雙魚真有信十雨不愆期尾  
後光常皎河中影漸移自符曰肅範預卜作霖時鱗已  
臨風動雲看蔽野垂

皇心期物澤天意果人隨豕白波頻涉蟾明畢正離莫  
嫌瞻有嘒賀雨草新詩

學然後知不足

得修字

學中無盡境自足每浮游不覽青箱富甯知白腹羞測

蠡非所貴汲綆在深求觀海眞難水登山自小邱如披  
千里霧試上一層樓半解何堪詡微長亦可收若非窮  
眼界未許進竿頭

聖主崇稽古儒林懋閭修

白受采

得宣字

白賁占无咎鴻章起後緣絕塵能不染受采妙相宣本  
以含貞吉從教致飾妍人工甯弗貴天分乃居先皎皎  
臨風色煌煌奪眼鮮誰經爲絢後還憶未施前作會誠  
如此程材亦類然從茲欣黼黻美質荷成全

密雨如散絲

得絲字

天意如人意甘霖恰應時纔欣疎作點倏已密成絲優  
渥初霑土輕勻更濯枝着花紅纈綻散水縠紋披煙細  
渾疑織雲濃直欲垂斜飛從絮溼不斷有風吹蟻垤占  
甯爽魚星驗早知

皇心勤歲事大澤沛無涯

龍星體見 得東字

巳月欣逢夏龍星正見東周天原按度位巽乃居宮奕  
奕精初耿蒼蒼色正融聯珠環斗極分彩建昏中巳卜  
剛辰吉還將大禮崇祥光瞻有嘒渥澤霈無窮旦晝占  
甯異天人氣早通

皇心勤歲事六宇慶和豐

大零用盛樂

得行字

龍見時惟夏  
諏辰祀典行  
禮明鸞輅舉  
樂備鳳簫迎  
肅穆行初獻  
鏗鏘奏九成  
近光民協志  
祈雨

帝含情柳外聽  
仙韻花間駐

翠旌臣惟將敬志  
工亦識中聲  
登降求昭度  
升歌用達誠  
佇看甘澍降  
四海樂豐盈

夏蟲不可語冰

得時字

堅冰冬用壯  
盛夏日方曦  
蟲豈知能飲  
言徒笑妄施  
壺藏同玉映  
株守等狐疑  
寒暑原殊候  
溫涼亦異宜  
自然

多所怪始信篤於時墟見皆如此微詞漫爾爲向陽甯  
有性强聒得母癡

朗鑑開拘識真慚篆刻辭

青出於藍

得藍字

五色青爲正誰知出自藍漫同拖岸水忽擬過江嵐美  
識由中發章原自內含若非功必倍安得采彌酣濃淡  
初何別工夫好細探盈襟煩手採如草對袍慙彰水知  
源重增華在性耽寓言聊勸學冰水理同參

檢書燒燭短

得長字

夜靜檢芸緗高燒樺燭香玉蟲摧不落錦贖卷還將刻

處分偏短回時味較長威靈呈祕旨太乙助餘光跋見  
更疑盡規看寸尙強鬚燃奴不易屏觸僕應僵壁隙無  
勞鑿螢乾不用囊焚膏思古哲向晦未能康

誤筆成牛

得牛字

晉代餘佳話清芬藝苑畱欲書因落筆乘興與成牛忽  
具春塘賞從知野趣浮淡煙新柳外長笛古原頭不用  
丹青染還矜楮墨幽畫沙虛客望扣角憶童遊豈有維  
魚夢甯孤司馬求揮毫徵變化團扇緬風流

其二

得通字

大令傳家學書兼畫並工誰教筆誤落幾訝技應窮妙

擬追張旭名偏掩戴嵩含毫停硯北寄想到脰東未報  
籠鷲客先欣叱犢童墨飛籜笠雨扇拂杏花風藝見難  
中巧思緣絕處通屏開蠅可拂佳話不興同

琥珀拾芥

得通字

物性潛相感珍傳琥珀紅吸針齊妙理拾芥著奇功芥  
化長松底舟浮覆水中分形疑有閩一氣默能通木德  
知從類天倪探不窮義均龍應鼓理協虎從風水溢方  
諸月聲傳蜀郡桐博徵難究詰推測問鴻蒙

夫子之牆

得高字

至詣尼山峻宮牆企每勞千秋瞻卓越數仞面周遭水

自環洙泗門還聚俊髦深難窺富美邃喜遠塵囂古壁  
絲兼竹春壇杏與桃儘教循以走但覺仰彌高銘鼎傳  
儂俯編詩戒達挑辟雍

醴化普傾耳聽笙鼗

斲雕爲樸

得還字

太樸誰初鑿由來政所關雕徵人巧極斲要古風還制  
必遵規矩師甯重爾班蕩心工有誠傷手匠奚患但得  
崇真意何來致飾訕或源惟本務去泰始浮刪國尙殷  
乘輅商嗷鄭寶環我

皇敦邳治



盛化遍瀛寰

味別淄澠

得澠字

水性誰能辨微茫  
淄與澠一瓢從滿酌  
兩派別奚憑其  
有思源意偏誇知味  
能甌看浮雪浪符不  
調山僧是口  
舉相似何人得未曾  
犀分兩故化壺貯妙  
能凝甕子因  
邀罷俞兒亦並稱衢  
尊逢

聖世小道莫相矜

李下成蹊

得蹊字

品望名臣峻高標  
借姓題龍門真是李  
畫省不成蹊花  
自無言放人偏由徑  
迷介然甯有跡穠矣  
直平溪密訝

漁樵問濃霑雨露低其看春有腳未許客扶藜癖性鑽  
堪鄙清標苦欲齊願承封殖意履道上雲梯

河海不擇流

得虛字五言八韻己丑  
會試 欽命題

黃河發星宿瀛海號歸墟莫訝流爭赴懸知納有餘派  
遙終自達源別會兼儲一氣涵諸夏層波注尾閭驚濤  
奔晝夜新漲護龍魚不用分清濁甯勞更決疏沙痕添  
雨後水氣靜晴初

聖量真無際含茹遍六虛

羲之換鵝

得庭字五言八韻己丑  
五月 保和殿朝考

內史工書最山陰記寫經偶然揮素繭便爾換珍翎野

鷺名休誚生龍筆自靈羣應依墨沼帖共重黃庭妙手  
從教乞長鳴乍喜聽賅來欣握管攜處待翻萍泛渚姿  
堪賞霏煙跡未零

盛朝多寶笈鉤搨仰儀型

爲有鷺羣癖臨池筆乍停墨香畱道院禽影靜空庭寫  
出勻霜穎籠歸愛雪翎高風誰計直內景自傳經波磔  
書原妙飛鳴趣倍形隊翻新漲水人坐綠莎廳別具陂  
塘賞能添楮翰靈稽山遺蹟在佳話並蘭亭

祕要傳真侶閒繙笈內經偶因求楷格拌與賅花翎筆  
挾飛鷺勢工逾瘞鶴銘跡應參玉簡名已重金庭拂紙

松煙裊揮毫蕙露零一羣欣得主數卷自通靈  
唼喋浮清渚參差入鏡屏從茲畱墨寶洞府晝常扃

晉代風流擅長畱翰墨馨右軍矜入聖道士乞書經豈  
惜揮筠管都將換素翎贈貽非片羽結撰得真形計帙  
窺丹祕開籠愜性靈幽姿移碧沼清韻滿閒庭紅掌牽  
文苻霜毛映翠萍忘機相對處逸思寄沙汀

惟善爲寶

得良字五言八韻甲午四月  
正大光明殿

御試考官

白珩豈國寶惟善重巖廊長也元居首溫其質最良席  
珍早待聘握璧未堪方舍己欽虞帝昌言拜禹王豐年  
原並玉歉歲可爲糧識藉冰壺朗材資玉尺量譁鬻先

屏黜追琢表章相

聖世儲材富璆琳貢玉堂

麥浪

得難字五言八韻丙午四月  
正大光明殿

御試考官

一望平原迥參差麥隴寬煙濃低蹴浪風細軟迴瀾掩  
映鷗翻白紛披日漾丹翠浮晴靄暖碧捲雨聲寒短笠  
穿塍過輕帆隔浦看聞香思餅餌發興憶漁竿生意郊  
坳足田家作息安民依軫

聖慮稼穡念艱難

披沙揀金

得良字五言八韻丙午奉  
命典試貴州闈題擬作

沙向披時汰金從揀處彰惟三品最貴無萬數難量淘

洗全憑力埋淪尙斂芒不貪能識氣去滓自生光但使  
虛衷採何憂至寶藏輝含知質重心苦顯工良敢信升  
沉偶甯嫌鑑別詳還期勤拂拭追琢貢

巖廊

周而不比

得同字五言入韻戊申天津

召試

題蒸和

御製原韻

似是非須辨循名寶豈同惟周恐涉昵不比乃存公器  
廓甯譏小情祛肯尙通無朋期各獻有黨戒交攻月印  
潭心皎波涵海量洪剛中君子貴側媚小人工孚自占  
盈缶柔仍誠繫叢奉三還抱一

睿照仰無窮

棲鳳難爲條

得年字五言八韻戊申四月  
正大光明殿

御試考官

淑貺投良友文披五色宣  
譬同條葦葦忽枉鳳翩翩  
小集霑新乳低翻散曙煙  
最憐枝幹好只羨羽毛鮮  
丹穴音諧律朝陽韻叶絃  
若非百尺挺難稱九苞妍  
振翼看輝遠干霄謝質堅

雲章陋薄技僧達並延年

老當益壯

得方字五言八韻庚戌  
會試 欽命題恭擬

壯志平生許甯緣老去忘何當  
勤策厲祇是益堅彊欲澹神  
逾定年增力更剛從教雙鬢改  
轉覺寸心長白首非遲暮青雲  
正激昂聖言仁者靜詩詠壽而  
康自有凌

霄氣無勞駐景方衢尊陳

化宇願進

萬年觴

循名責實

得班字七言八韻乙巳二月  
宮 御試翰詹諸臣恭擬

乾清

虛名自古原難冒求實須知克副艱  
先後理甯寬責備  
主賓道本似循環採珠遇目應防混  
剖璞捐珉立辨頑  
被褐未妨成我鬣不觚還恐致人訕  
但敦白賁真无咎  
徒飾虛車亦厚顏廢學由來嘲子佩  
素餐尤懼玷朝班  
人惟務本斯爲美事或從浮概與刪

聖世卽今崇樸學服官何以免譏瘴



三松堂集卷十九

吳縣潘奕雋榕皋

水雲詞一

南鄉子

畫禪寺步月卽送劉崧嵐之官奉天

良夜碧雲收，抽得閒身共獻酬。笑指畫禪竹柏好清幽。  
步月承天故事畱，酒半引離愁。有客鳴鞭不自由，塞  
北江南無限夢悠悠。明歲今宵憶此遊。

念奴嬌

西湖泛棹圖

清波門外記一篙撐入畫圖時  
節萬頃玻璃嵐翠合映  
我鬢眉都碧宦海浮沈廿年浪  
走好景輕拋別酒闌燈  
施舊遊有客能說  
最羨綠鬢朱顏招邀勝侶不負閒  
風月樂事賞心真合并塵世何堪  
一映清興能乘扁舟  
便買西子還應識只愁相笑滿頭  
贏得霜雪

賣花聲

立秋

置酒賞新秋莫管閒愁碧天如洗  
月如鉤一派銀河衝  
浪溼斜入西樓  
宛轉聽歌喉自揣心頭今年強似去  
年不榮世勳名傳世業一槩全休

如夢令

春暮

煙鎖池塘碧樹樹上殘英  
晉絮酒醒獨尋春春與蜜蜂  
同去無緒無緒簾外落紅如雨

壺中天

寄懷畏堂

黑頭全白算紅塵勞攘成來何事少歲科名如拾芥妄  
覬銀青金紫馬脊船唇螭頭豹尾冉冉今如此浮生同  
夢一竿閒弄煙水 太息袞袞諸公輕裘肥馬也半歸  
蒿里老樹柴門來舊雨落落數人而已寄語天涯啣杯

擊鉢清興都無矣黑甜有味化蝶但學莊子

滿庭芳

月夜

煙散衣篝光縈簾押金波涼浸雕櫳清醪盈杓良宴記  
曾同回首年華荏苒歌聲杳殘夢惺忪關情處酒痕襟  
上點滴染香濃臨風嗟路隔年來騎省鬢擬霜蓬念  
送闌杯暖射覆燈紅離恨天涯幾許清輝裏佩憶丁東  
今宵永酒闌更轉雲外有征鴻

浪淘沙

歌筵有贈

禪榻颺茶煙一卷楞嚴花飛剝動又情牽可惜國香天  
不管零落誰邊火井出青蓮只要心堅情根俠骨佛  
生憐塵海收帆須及早莫待他年

一翦梅

憶昔

憶昔妝成上錦車遠向天涯不憚風沙綠窗朱戶繞雲  
霞食也伊家宿也伊家而今憔悴感年華鬢改雛鴉  
曲怨琵琶春風昨夜上窗紗愁煞梅花笑煞桃花

減字木蘭花

送朱礪東之楚中

桂花香處正好嬉遊何處去草綠平蕪不是行吟學左  
徒明朝京口滿眼青山還對酒風緊雲飛一片斜陽  
上客衣

虞美人

天寒倚竹圖

扁舟繫纜垂楊浦花落如紅雨天寒翠袖畫圖開猶似  
當時水檻共徘徊風花煙月知多少故將人惱小  
樓風絮又春寒誰竝香肩軟語倚闌干

滿庭芳

陶鳧香蘇臺却扇圖鳧香歸自京師娶于徐

種柳門庭聽松樓閣歸來正是春深蘇臺日暖香氣透  
疏林却扇新詩賦就鎖窗裏煙靄沈沈湘簾卷重行珠  
樹雙舞有文禽 蘭心兼蕙質女中孝穆竝坐調琴更  
不羨秦家耀首金簪縞紵天涯幾許問何似繡闥知音  
生花管珊瑚高架風絮好同吟

虞美人

徐榆村訂遊畫眉泉雨阻不果寄懷

小樓一夜聽春雨屋角雙鳩語幽齋遙想翠微間窗外  
泠泠鳴玉漱飛泉 瑤笺枉把佳期訂人事眞難定青  
鞵只待溼雲開準備筇輿一徑入山來

浪淘沙

辛酉三月一枝軒餞春

把酒問花枝春去何之濃陰如幙雨如絲我惜春歸春  
戀我欲去遲遲 未免有情癡無語尋思惜春誰爲訴  
春知且倒金尊拌酩酊不賦新詩

憶江南

丙辰五月雄縣道中

江南好最好石湖船雙屐上方初過雨一篙新郭樹含  
煙小艇自年年

江南好最好是山塘杏子單衫臨水影鴉雛雙鬢送花



香畫舫繫垂楊

江南好最好是天平來燕榭邊春正午兼山閣下雨初晴一夜聽泉聲

江南好最好是靈巖一逕松風迎步履半天嵐翠落衣衫雲影太湖帆

南歌子

三松堂芍藥

粉膩翻風重紅嬌怯露寒海棠開盡牡丹殘一任芳姿濃淡占雕欄瑞不徵金帶詩曾和玉盤狂香浩態故依然且向蕭齋幽幌盡情看

賣花聲

新安江舟行卽事

滿眼是青山山脚風帆白雲如絮護孱顏身在一峯圖  
畫裏疊翠浮嵐 細雨獨憑闌乍暖還寒小洋灘接大  
洋灘孤艇今宵何處泊煙水漫漫

水調歌頭

王蓬心洞庭泛月圖爲瞿花農題

秋氣一何爽青草碧黏天良宵載月輕泛涼入鷺鷥煙  
風定魚龍吟嘯有客掀髯打橐瀟灑似坡仙河漢夜闌  
轉露重未能眠 擊桂棹吹玉笛做瓊筵姮娥還憶往

日見潑墨飛箋樂事賞心誰共陳迹回頭若夢圖畫至  
今傳惟有蟾宮影不改舊嬋娟

吳山青

竹林靜憩圖

泉聲清竹風輕身遠塵氛心太平閒看溪上雲 養黃  
甯葆奇靈我坐林間歲月深輸君雙鬢青

百字令

乾隆甲寅崧嵐將之奉天任余邀張子東畬同  
遊畫禪寺訪崑峯長老步月庭中東畬寫圖贈  
行竝系以詞余繼作南鄉子一首今嘉慶甲子

崧嵐復至吳門出前圖共賞回首舊遊恍如昨  
日流光彈指蓋已十年東畚歸道山則五年矣  
喜良會之能再慨逝歲之不居復填此闕以寫  
離緒記新歡云爾

山塘淥漲報雲帆漠漠仙舟纔泊舊恨新愁難縷述喜  
看鬚眉如昨細檢行囊重提往事一幘珍林壑故人安  
在謂東畚墨香猶染簾箔十載按部班春關鴻梁燕矯

首天寥廓前席蒼生他日事且把繡衣遲著退院僧歸  
峯謂崑閒吟客健商略吾儕樂清光依舊一尊來共斟酌

菩薩蠻

戴竹友除夕遊山圖

疏林寂歷寒鴉小山塘屐影筇聲杳何處覓閒身祇應  
三兩人屠蘇斟歲酒歲去誰能守我也想今年邀君  
同放船

金縷曲

嘉慶丙辰蔣湛華司馬納姬人妙巾寫瓊樓待  
月圖同時王夢樓陸謹庭尤二媿皆有詩詞以  
詠歌其事今湛華候補在都倩哲兄立崖索余  
題句余以爲瓊樓之景今昔無殊而待月之情  
今昔則異因填此闕兼寄湛華未識湛華見之

以爲有當于國風草蟲遺意否耶

又是中秋近看樓頭冰輪依舊照人如鏡香霧清輝三  
徑裏玉臂雲鬟涼映正寶鴨煙沈炷燼千里音塵經歲  
闕怨征鴻不帶南來信聽嘹唳長天陣 嫦娥相憶重  
相訊道花前輕顰淺笑倍添風韻但覺腰肢微瘦損莫  
是多愁多病渾未減搓酥滴粉好倩銀蟾遙寄語問天  
涯歸計何時定雙照我闌干凭

望海潮

檢篋得高麗墨一挺爲己故兩粵制府吉公有  
堂同官內閣時所贈墨高三寸三分闊一寸厚

二分有陽文曰翰林風月

森沈庭樹翩翩階蕊濃香記試紅絲風月翰林溝瀆使  
節攜來周道委遲珍重故人貽念山雞雲鶴宿竝高枝  
雪爪萍蹤卅年春夢總迷離 松窗興寄臨池歎人亡  
物在欲見無期真墨磨人非人磨墨羊城往事難追鄰  
笛一聲悲漫閒濡筠管悶靠烏皮譜入哀絃錯刀何處  
報相思

前調

程君房墨一挺爲畫禪寺長老崑峯所贈今崑  
峯返丹徒云將復來姑蘇晴窗試筆感念舊遊

因填此闕以促其行

庭橫疏翠簾搖嫩綠禪房竹樹清幽貝葉課餘蓮花漏  
轉文匳點漆香畱分贈許湯休看惜將金比落竝煙浮  
拂拭蠻箋肯教容易把鶯酬 昨朝古寺重遊正錫飛  
依鶴杯渡隨鷗餘習未除前塵似夢難忘智永風流天  
際望歸舟更閒依淨几振觸新愁書寄征鴻數行濃淡  
灑銀鉤

金縷曲

送滄來觀察之任淮徐

畫舫停撾鼓看胥江香盆童叟闔街盈戶綠浪紅欄佳



麗地頗憶當年出祖，晒曲罷留人。鸚鵡兩載，木蘭堂上，月照香山。此日心偏苦，忍便放峭帆舉。中和樂職，誰能譜引，雙旌弓刀千騎。按行淮浦，到及河清，剛獻瑞一片榮光。浮渚想重上黃樓，懷古迢遞，知音遠道，隔悵頽齡。懶把冰絃撫，但目斷暮雲樹。

鳳凰臺上憶吹簫

新秋三松堂對月用漱玉詞韻

蛩咽籬根露，明松頂一輪。又見當頭喜，畫檐波影冷。浸簾鉤，莎徑筠廊宛轉，小軒牖。自署三休，西風爽紅牙，鐵版待賞新秋。悠悠倚闌，暗數三十載前塵，夢斷痕留。

盼廣寒縹緲路阻瓊樓惟有樓中仙子還向我斂黛凝  
眸銅壺轉良宵又增一片閒愁

虞美人

詠茉莉

玉簪未放池荷老露朶筠籃小水晶簾卷月遲遲香在  
烏雲濃處半開時金絲織手重重綴蘭麝真難賽簞  
紋如水帳如煙涼到青奴無夢憶當年

鵲橋仙

七夕雨

銀河彩匿金波雲掩羅袖夜涼無寐人間天上一般愁

歎好會原非容易 庭前瓜果樓頭笑語多少悲歡往  
事天公莫是也多情替牛女暗彈別淚

沙頭雨

題蔣春皋遺照

三徑依然湘簾半捲琴聲杳墨香還裊想見幽人抱

記坐書堂看畫同談笑循闌遶昨朝重到池上秋風嫋

池上書堂  
春皋齋名

菩薩蠻

雪島禪師行到水窮處坐看雲起時圖

幽棲地僻經過少

杜甫

一瓶一鉢垂垂老

貫休

世事總

無心

王建

流泉入苦吟

皎然

禪心超忍辱

李嘉祐臨

路嗟疲足

張九齡

雲在意俱遲

杜甫

林光澹碧滋

李白

菩薩蠻

詠煙草

何人種出相思草  
依人欲化情絲  
裊賦到淡巴菰  
繙書故事無  
香銷吟未就  
春困鍼停繡  
合伴一甌茶  
輕圓泛乳花

羅敷媚

題冒巢民姬人董小宛墨菊

染香小閣秋光裏  
簾捲波紋貌取  
煙痕人影如花瘦  
幾

分 西風畫卷餘香在雅淡輕勻彷彿丰神合配眉樓

九畹春

陸謹庭齋中藏顧橫波蘭冊蒼秀絕倫在薛素素馬湘蘭之上余借觀畱三松堂一月

水調歌頭

三松堂桂花盛放用顧仲瑛宴金粟影亭韻

香氣小山滿靜憩豁閒愁西風涼露霑袂猶記廣寒遊  
屏却舞衫歌扇飄墮瑤笙鳳管幽賞愜新秋且酌掌中  
酒況有月當頭 卷湘簾揮松塵灑銀鉤玉山深處金  
粟亭榭擅風流水調歌頭一闕和者袁華于立張遜陸  
仁佳話在蘇州試聽唱金縷莫更憶瓊樓

三松堂集卷二十

吳縣潘奕雋榕皋

小雲詞二

摸魚兒

滄浪亭懷古

傍城南秋光如畫漣漪縈抱層阜林深徑曲宜幽眺正  
是桂香時候凝佇久記俊侶年時幾度曾攜手觀河面  
緞認翠膀銀鉤滄浪亭三字額爲明文徵仲書蘚階雲磴風景尙依舊  
平橋外指點涼蟬疏柳廢興冷眼樵叟清風明月原  
無價只合閒身消受頻搔首問良夜吟魂還到荒亭否

鄰鐘又吼但目極斜陽瓊田一片佳句諷歐九

點絳脣

杜鵑花爲醫者徐鑿泉賦花一紅一白薛一瓢  
康作霖兩醫家舊物也

花事闌珊芳情偏爲雕欄駐聲聲歸去記遍青山路  
小白嫣紅慣傍丹房吐紛無數鶴林何處此地春長住  
摸魚兒

石湖遊海潮菴感賦

泛澄波海潮菴下柳邊短棹還艤鐘魚寥落殘僧去金  
像尙明塵几苔殿啟正節過重陽遊舫全無矣滿湖秋

水望荻岸蒹鄉孤村如畫一縷爨煙起 草堂裏曲磴  
層岡迤邐照影更鑒清泚心香曾擷溪毛薦往事憑欄  
能記行且止歎慘綠人來鬚鬢今如此枯藤倦倚待霜  
染楓林白雲斜徑吟策會重理

前調

遊靈巖山

山下有韓蘄王墓碑

過塘灣篷窗閒倚浮嵐引駐歸棹霜花染就山腰樹宿  
露朝來都埽秋正好聽十里松濤曲折穿雲嶠凌虛縹  
緲看屨去廊空臺荒琴寂一鴈下林杪 塵寰事今古  
悠悠多少豐碑突兀雲表清涼居士清遊日曾拾吳宮



花草村路杳問來往甯邦誰識幽人抱

穹窿山甯邦寺相傳爲韓蘄王

隱處冷吟客老算輸與山僧龕燈芋火鐘磬送昏曉

前調

簡田過訪三松堂喜贈

問何爲年年雙槩栖栖吳越來往新霜又染楓江葉薇  
省玉堂天上蘆荻港有舊雨漁兄許作去聲五湖長櫻

鞦竹杖喜別久重逢鬚眉換了眠食勝疇曩 回頭想

半世眞憐勞攘卅年一夢虛妄東籬花好身還健且泛  
殘醪閒賞秋正爽指天際飛雲頃刻紛殊狀呼來都講  
任振笛贊洲聽歌柳院此意儘疏曠

浣溪沙

秋意

曲几蒲團夢醒餘  
西風涼透碧紗幮  
籬邊花影瘦扶疏  
別葉蕭蕭堆蘚砌  
斜陽冉冉下平蕪  
佩魚能換濁醪  
無

滿江紅

詠筆

几靜窗明有毛穎  
伴人幽獨懸健腕  
墨磨奚李練褫幾  
幅投問封侯可有分  
拈憐有鬼誇偏速  
看如椽落處滿  
雲煙追芝旭  
評聖病論筋肉從愛憎  
分難驚料歌雲

繪日此君無福畫諾前塵渾不記生花舊夢還能續笑  
東西塗抹慣年年頭全禿

前調

詠紙

什襲文房展素几晶瑩光溢濡散卓雲藍方滑桃花比  
色紆蚓幾人誇翰墨塗鴉大半謀衣食歎鑽求無益費  
精神叢殘積灑不盡金壺汁摹不到簪花格較吳綾  
東絹倍加珍惜結習但招文字債一生未得文章力看  
張張揭處似人情今猶昔

前調

詠硯

誰割溪雲贈墨客，珍如瓊玖拂拭處。紅絲明潤青花勻，  
透愛護直同書劍癖。流傳幾見雲仍守，算心朋不律竝。  
隄隄輪君壽，縝密質無塵垢。方嚴性從天受，鎮傾心  
輸意要斬不朽。竹屋青氈憔悴客，春風詞筆生疏手。儘  
相看頑鈍耐人磨，真吾友。

前調

詠墨

雲護芸窗文匳啟，井華纔汲杼妙腕。一丸初試黝如點，  
漆古硯有香橫几。淨漏痕挂壁生綃溼，問從來知白守。

何如依然黑 書來澹名誰識眉能畫人空憶自廷珪  
去後藝林減色未免縱橫隨手抹還教矜慎如金惜稱  
元亭岑寂閉門居娛閒適

摸魚兒

甲子九月山塘看菊載百本歸供三松堂下

放扁舟桐橋西去看花須趁新霽天空雲盡遊氛息老  
圃秋容明麗開次第愛七里山塘如繡還如繪閒來滋  
味算已嗅天香未看紅葉只此是歡計 呼蘭榭歸路  
霜風吹袂麗人載去相對 白香山虎邱詩  
花船載麗人 畫欄吟几安  
排處濃淡高低向背松竹配看疏影斜枝不比春花媚

無嫌瑣碎待堆竝山高持螯斟醕謀取晚來醉

探春令

甲子嘉平一枝軒消寒作

芸窗垂幔雪花微颺深冬晴暖畫屏棐几濃香滿却早  
又紅梅綻 燈明酒綠重開宴喜年年人健等轉頭九  
九寒銷相與再結尋芳伴

清平樂

壽筵

繡簾風軟人意如春暖縹緲瑤池吹鳳管璧月十分圓  
滿 聯翩桂樹蘭枝錦衣介壽雙卮正是玉梅階下百

花頭上開時

前調

荷淨納涼圖

波平雲淨瀉露香搖影屬玉飛來翹雪領也愛銀塘清  
景曉來月墮前溪水風涼透羅衣莫話遠公遺事畫  
中人是天隨

前調

三松堂松下作

虛堂疏快謾謾吟天籟暖不加榮寒不悴許我年年相  
對任他冶蝶狂蜂儘教雪壓霜封試問山紅澗碧幾

番開落春風

惜餘春慢

洽園池上新柳阿儺可愛芝巖出新詞同賞倚  
聲和之

郭外寒輕池邊煙暖壓水紅闌回互嬌黃半坼淺綠纒  
抽偷樣憶他眉嫵正是春晴晝長一曲新聲聽翻金縷  
奈凝眸延佇絲絲拖逗慣牽愁緒 猶記得歌散梁塵  
舞低樓月綽約小蠻三五新鶯欲占姹燕重來依幕向  
人頻訴彈指前歡夢中殘月曉風年華虛度問春光依  
舊風前思曼可還如故



齊天樂

樸園探梅鄧尉以詩紀事洽園譜齊天樂一闋  
和之因次其韻漫填此解

酸香彈指經年別停橈早開笑口徑轉潭東筇拖銅井  
空谷天寒翠袖凝眸望久想賞遍千林月明吟就譜入  
冰絲疏枝幽韻鬪孤瘦玉簫入夜吹透晚煙濃淡處  
歌囀鶯溜豔福清歡賞心樂事須是天容消受閒身那  
有算眼底韶光幾番輕負聽到更闌肯教杯放手  
樸園言是  
日歌臨川曲至錦屏人忒看得  
韶光賤句有感成詩故及之

金縷曲

乙丑三月芝岡七十生辰同人載酒山塘默齋  
諧金縷曲爲祝繼聲和此

滿酌金罍酒借尊前花明柳媚介君眉壽蝶板鶯歌白  
隄上正是日長時候聽減字偷聲迭奏醉向可中亭畔  
步問生公見此閒人否公道是近無有 尊鱸飽啖歸

田久

翰

嬾乘槎

騫

蓑衣箬笠伴煙波叟

志和

一角雲巖

青蒼色抵得華山濃秀

詠

待招取赤松爲友

良

故事君

家吾能記要看君倒跨箱驢走

果老

君大笑拌濡首

旭

壺中天慢

網師園牡丹

三才集卷之二  
十一  
曉簾風靜正芳園春霽閒移筇屐杏靨桃腮零落盡照  
眼嬌紅輕坼酒可消愁花眞解語好景能虛擲天香凝  
袖與君聊共浮白 聽說樂事當年畫闌十二羅袂環  
歌席畫錦樓臺彈指換遑問姚黃歐碧漾彩杯深護香  
屏暖良會歡今夕清平重按盛衰休感疇昔

好事近

勛齋昔宰蜀中作聽秋圖題詠甚夥今歸吳門  
卜宅於城東後有小園彷彿圖中景象因寫聽  
秋第二圖合裝成冊屬余題句

飛棹下嘉陵一壑儘容邁軸彷彿昔年遊處指案頭橫

幅 秋聲又到枕函邊  
舊夢可還續且自淺斟低唱看  
酣紅濃綠

太平時

竹坪竹嶼垂釣圖

修竹植欒覆碧潯影森沈蕭然心跡喜雙清好垂綸  
青筠綠蕨誰是伴憶元真釣絲裊裊立蜻蜒滿身雲

蘭陵王

城東歸田園明王侍郎

心一

故第園有蘭雪堂

堂額爲文徵仲書余家藏侍郎招友飲園中札  
有人事雖殊清光如故既是悲秋不可無酒以

澆之語今歲春仲復遊園中則額已無存堂亦  
頽圯詢其後人無復翰墨畱存矣因感昔遊重  
緜舊札漫填此調以寫幽情

柳陰碧風暖吹簫巷陌城東路坊過迎春閒向荒園散  
吟屐歸田緬陳跡畱得筠廊舊刻平橋外林密徑幽葉  
底鶯聲尙延客前朝事能憶想月榭飛箋風磴移席  
花明蘭雪香凝筆看疊疊濃靄鱗鱗波光嵐翠日  
暮色又何異今昔小立憩磐石嘅剩殘山草沒苔  
積雲仍世守還遺宅認零落殘簫疏淡墨飛來雙燕  
似爲我訴楚惻

木蘭花慢

五月下澣帶星堂讌集

懶尋山間水，賴絲竹寫幽思。恰小部呼來，移將酒醖坐。  
傍花枝，相期緩評細品，正濃陰深院日遲遲。錯落珠璣，  
絃索輕盈，楊柳腰肢。金卮到手，休辭開笑口，展顰眉。  
信離合悲歡，逢場竿木，今古如斯及時未妨行樂。莫勿  
勿擾擾夢中馳，拌是玉山醉倒，不須問夜何其。

前調

芳谷客楚中，識歌者楊郎，別已數載。今于故里  
相逢，爲述天涯飄泊，頗有憔悴之感，爲填此闋。

屬余繼聲

問櫻桃信息奈蝶夢兩差池想笑淺顰輕嬌紅姹紫輪  
與丰姿分飛暗彈粉淚記那回團扇有題詩楚樹吳雲  
漠漠斷鴻不寄相思 何期意外手重攜低唱捧金卮  
悵雨跡雲蹤芳情未減心事誰知栖遲自憐瘦影尙依  
依風裏舞腰肢多少天涯舊恨一尊試聽新詞

翠樓吟

和芳谷喜芝岡月夜過洽園聽歌之作

竹影梳煙松濤捲暑冰匳晚涼高挂胡牀堪坐嘯印心  
跡桃笙光射簾櫳如畫喜巷北朋來素心情話閒亭榭

忍教輕負好天良夜 況是珠串歌喉有舊時田順淺  
斟瓊畢銀屏看浸冷歎風月人間無價姮娥應詫恁等  
是塵寰偏能瀟灑欄干下一聲仙籟露荷珠瀉

如夢令

夏夜

檐角流螢飛去簾外荷香微度月轉小紅闌隱隱簫聲  
何處閒步閒步惹得滿身涼露

水龍吟

洋海棠又呼象牙紅皆俗名也譜爲扶桑花芝  
巖有作和之



畫堂銀蒜低垂一叢豔奪池蓮影耕園驛畔臨漳城外  
婆娑瘴嶺狀考稽含詩吟玉局移來煙艇是何人巧借  
佳名蜀客貯金屋丰標逞寶鴨海南炷爐扇薰風翠  
深紅映燒空皎皎佛桑日及更誰重省蕊碎迎曦葉低  
含露一般風韻試深宵也與高燒樺燭照春醒醒羣芳譜扶  
桑一名佛桑一名日及產南方臨漳志花似槿一本高  
四五尺枝葉婆娑宋蔡襄有耕園驛佛桑花詩東坡詩  
皎皎燒空紅佛桑又詠海棠詩更燒高燭照紅妝海棠  
號蜀客石崇嘗謂海棠若有香當以金屋貯之稽含草  
木狀扶桑出南涼郡花深紅色五出日光所耀疑有燄生

臨江仙

瓶中白蓮和韻

昨夜小池暑退池邊攜得涼雲玉壺冰簟水晶屏素心  
堪晤語清淨契前因月曉風輕未墮煙鬟霧鬢無痕  
金波穆穆與傳神出泥能不染肯惹世間塵

洞仙歌

黃蕘圃逃暑圖

科頭雲磴喜蕉衫風透世界清涼自原有儘行空火繳  
赫赫高張信暑氣修竹碧梧不受抽身閒處好利鎖  
名韁熱客招尋但揮手回想舊遊蹤撲面黃塵可也得  
調冰雪藕莫更問門前幾人來除舊侶盟鷗有誰相就

浣溪沙

何淡安楓林晚眺圖

遠上寒山一徑幽，四山楓樹正酣秋。  
白雲深處好勾留，試坐籃輿眞澹蕩。  
閒拖竹杖也風流。劍門吾谷記清遊。  
壬戌九月三峯僧一峯招看紅葉徧覽劍門吾谷諸勝

前調

素心蘭

簾額低垂小院深，冰肌那有俗塵侵。  
祇應入室許同心，采處定聯瓊作佩。  
初來眞契雪盈襟。好將幽意譜瑤

琴

好事近

馮墨香自在舟漁簃圖

橫簃放扁舟吹入碧雲深處不按嘯翁遺拍有自然風  
趣 稻村蘆岸儘沿緣得住便教住試問知音若箇指  
沙邊鷗鷺